

阿文成公年譜

阿文公年譜卷十一

受業

王昶勸定

第三孫那彥成恭纂

盧蔭溥增

三十九年甲午五十八歲

正月初五日

公奏言臣欽奉

諭旨令奎林富德等徑分功噶爾拉當噶爾拉進攻臣以

現有兵力計之臣處官兵共有二萬六千應於美

諾底木達等處及附近谷噶之後路畱兵萬餘所

存一萬五六千人自不能再撥數千由功噶爾拉等處進攻以分賊勢而明亮處官兵共二萬人除分防各處止有兵一萬餘人現在明亮酌議于當噶爾拉各隘駐兵一千名亦僅敷哨探不敷進攻之用是以臣前奏于附近功噶爾拉以及登春牛廠等處多舉烟火多張聲勢牽綴賊人其南路情形亦復如是至小金川全境必藉能事大員彈壓督率美諾固爲適中之地而底木達布朗郭宗亦爲接應谷噶緊要之區常青一人兩處照料仍恐鞭長不及尙須另派大員接應至僧格宗係四面

受敵之地其礮寨本在山麓近經燒燬卽欲設兵
須駐在山梁之上方爲得勢且須熟于該處情形
者方能料理總兵英泰叅將汪騰龍在南路日久
應於此二人內派畱一員駐扎似屬有益並札知
明亮商辦其俄坡一路難以前進之處業經豐昇
額探明具奏且豐昇額處止有兵五千往彼進攻
斷不能得力而凱立葉一處形勢旣爲較便聲息
亦屬相通於此前進可以直據薩爾赤鄂羅山從
上下歷臣實因進剿金川各路中惟此兩路尙可
望其得手而此兩路中又必分途並進始爲有益

若復一失此機其勢更難是以不敢稍有拘泥現
又飛札豐昇額令其前來凱立葉合攻以收采入
之益奏入

諭曰辦理此事原不易今既進兵觀汝等何以奏功慰朕
耳

公又偕色布騰巴爾珠爾奏言臣等于一切進剿
事宜現已料理粗備其米麵人夫約至月初均可
接濟至抽撤各卡官兵已連日分起密赴底木達
一帶存駐且于谷噶一帶形勢或併力同攻或分
兵繞截均與統兵大員詳密籌定而各兵亦人人

思奮今擇於正月初一日密往底木達初六日卽
從該處發兵雖距谷噶尙有五六站臣令軍士兼
程而進裹帶乾糧不許舉火定于初十日從谷噶
丫口進攻務期采入其豐昇額明亮等兩路已飛
檄寄知同時並舉而舒常宜喜軍營亦囑其駕馭
新土司多派土兵奮力攻打以收牽綴之益奏入

諭曰據阿桂等奏定于正月初十日各路同時並發所辦
甚好佇聽捷音又據稱官兵撤赴底木達俱令裹帶乾
糧不許舉火自應如此辦理至所稱僧格宗章谷一路
應于總兵英泰叅將汪騰龍內派留一員駐扎卽著派

英泰在彼實力妥辦

初六日

公偕色布騰巴爾珠爾奏言臣等派出官兵由簇

拉角克美卧溝一帶直抵大板昭曾頭溝等處一

面察看道路情形一面搜捕林箐逸番當經保寧

成德等殺死賊人一名並送到拏獲番人和爾嘉

及番婦阿和阿朗二名訊係被賊帶往金川旋又

回來尋覓口糧被兵拏獲其所聞僧格桑拘在科

思果木及其小女人別在勒烏圍官寨與向來番

人所供相符再該鎮等借搜查之便已同海蘭察

將金川連界地方道路探知梗概若仍于曾頭溝大板昭一帶駐扎該處與谷噶凱立葉相遮恐爲賊人所覺預先防守臣等仍令其撤歸底木達大營使賊無從窺測以便猝然由彼前進

公又借色布騰巴爾珠爾奏言臣等接奉

諭旨以豐昇額奏俄坡一路山大溝深難於徑進命臣詳悉覆奏竊念當噶爾拉形勢本爲陡險而功噶爾拉尤爲山峻礮堅雪深路仄此二處不獨攻剿甚難而後路綿長卽牽綴亦殊不易是以臣等從前籌議於谷噶凱立葉以及馬奈博堵二處爲併力

合攻之計查南路河北之馬奈馬爾邦本係巴旺
布拉克底之地而河南之博堵亦係該土司等舊
壤過此卽克舟九寨地方若從深嘉卜繞出襲取
博堵並能佔住思覺則克舟九寨不難分搶而得
便可直抵僧達旣得進攻噶拉依之正路而當噶
爾拉賊人難于存立必將不攻自潰其河北馬奈
馬爾邦番人均係巴旺布拉克底舊時百姓又該
土司復地之志甚誠屢請派出土兵願爲先導
等通計金川地方不過八十餘寨若一動兵卽已
搶得數寨先可挫其鋒而奪其魄得手之後仍可

分兵渡河與深嘉卜博堵一路之兵併力攻勦惟是思覺一處最爲緊要得思覺方可望克舟九寨是以襲取思覺之路現在明亮等悉心躡探竭力籌算至于谷噶凱立葉兩處路生途遠辦理匪易臣阿桂自當獨任其難但谷噶第一道山梁礮卡本少其第二道山梁礮卡嚴密若從此繞越搶據格魯瓦覺三寨斷其來援之路則第二道山梁之賊亦可不攻自潰過此至勒烏圍雖有礮寨皆係據高臨下甚爲得勢而凱立葉一路道途易進豐昇額若佔得薩爾赤鄂羅山梁順山而下則不獨

各卡官兵賊不能從旁阻撓卽康巴達格什戎岡亦被官兵截斷在外而穆爾津岡之賊已不能與勒烏圍聲息相通卽或用船過河以通河北宜喜等處之賊而河寬水急往來實多不便且官兵一至谷噶山梁與凱立葉對面相望礮聲亦可相聞而穆爾津岡一帶賊人所設礮卡皆爲向外守禦之具我兵轉從內奪攻賊必難于抵禦則丹壩存駐之兵亦可前來會合此兩路官兵實相須而不可偏廢前此接奉

諭旨令豐昇額或從丹壩或從俄坡而

臣阿桂屢次奏明

請令豐昇額前來凱立葉並屢次札致豐昇額不
必游移實因身膺軍旅重寄必求於事有濟非惟
不敢稍分畛域亦不敢稍存緘默今欽奉

諭旨以俄坡難於直入丹壩亦非可長驅徑進豐昇額復

奉

諭旨必前來凱立葉會攻自可卽期采入况前據知府盛
英稟稱綽斯甲布應襲土司雍中旺爾結率其土
舍頭人來見稱聽得金川懇三雜谷代求若獻出
僧格桑卽可撤兵完事令綽斯甲布亦與他講話
可保八年十年無事如果大兵必滅金川我們除

已派出三千六百人外更把百姓多派出來別尋
進路誓必奪取山梁等語臣閱其所稟之詞頗爲
眞實因卽批諭以本將軍不滅金川不休之心係
汝等所深知旣欲多派百姓奪取山梁現有參贊
舒大人帶兵駐扎本將軍一定進剿日期知會到
時汝等卽可督率多兵奪攻助剿臣等察看綽斯
甲布情形實爲出力若果能奪取山梁而豐昇額
及臣等之兵又從谷噶凱立葉下至河邊則于舒
常之兵只隔一河從此合攻勒烏圍等處不獨摧
開要隘已可得金川地方之半均奏入

詔曰阿桂等奏籌畫進剿情形頗見誠心所籌甚善是阿桂豐昇額一路之兵甚爲得勢如果能進逼勒烏圍則賊人外險已失必多惶窘自難久於支拒便可掃蕩賊巢擒縛兇豎以成大功指日卽屆進兵吉期竝望捷音速至又據稱綽斯甲布土司等情愿多派番兵搶奪山梁其情頗爲真切卽諭以督率多兵奪攻助剿等語所辦甚合機宜又據奏拏獲小金川番人和爾嘉供詞其說未可盡信但所供情形與前此詢問番人等供詞均屬相仿看來金川賊衆此時尙視僧格桑爲奇貨直待情勢窘迫再行獻出以圖解免或將七圖安都爾等一

併同獻其情大率類此但兩金川罪大惡極萬無可道
並非縛獻逆首所能完局況今各路進兵尤不宜復通
支檄設或賊人情急差人詣軍門獻俘求降均宜置之
不理一面將所獻賊酋賊目拘留仍卽設法擒其所差
頭人一併檻解京城磔處示衆一面上緊進剿各路將
軍均當深體朕意切實辦理朕惟早盼喜音之至

十二日

公偕色布騰巴爾珠爾奏言

臣

等接豐昇額來札

定于凱立葉一路前來惟是將軍行動易爲番衆
傳揚因囑豐昇額先爲揚言欲來美諾底木達等

處與各路將軍會合俟至曾頭溝薩爾赤鄂羅山
溝猝然進剿庶使賊人無備但豐昇額處兵力尙
爲單薄且豐昇額由卓克采前進經過各隘口內
如孟邦拉腊覺溝各處畱兵二三百名曾頭溝口
亦應設兵三四百名已令官達色於所帶分駐黃
草坪兵內撥出八九百名分駐各處庶後路可以
無虞再三雜谷土兵之在宜喜者共一千餘名臣
等向聞其與綽斯甲布不和畱在該處無益應令
隨豐昇額進剿伊等距其巢穴甚近自必倍加踴
躍而舒常處尙有漢兵四千七八百名又綽斯甲

布土兵三千六百名共計有兵八千餘名以之牽綴駐守無虞不足臣等又派健銳營兵五百名索倫兵二百名令與前次所派之三百名合爲一隊又派西安駐防兵一千名與豐昇額所帶之西安駐防兵均歸副都統書麟管轄又派陝甘兵三百名令侍衛伊達里常保任等帶往扣計路程限於初十日直取薩爾赤鄂羅山隨同豐昇額一路進攻聽其調度是豐昇額處已有兵萬餘聲勢更爲壯盛臣等屢將進勦機宜詳悉指示並道路里數繪圖貼說星馳寄往又派番人二名前往以爲鄉

導自能收分路合攻之力至明亮處思覺探路之人尙未回營并據札知於二十七日自納木覺爾宗移營前赴章谷俟得思覺之信發兵進剿亦可無誤此期臣等已將應駐之兵抽撥駐守進剿之兵皆令夜行晝伏密赴布朗郭宗一帶聽候進發所有火礮鉛丸及應領乾糧米麵於初五日以前盡行妥備臣等於正月初一日自美諾起程一至布朗郭宗卽於初六日進發於初十日攻開谷噶丫口爲長驅直搗之計

公又偕色布騰巴爾珠爾奏言賊目丹巴沃雜爾

等在卡外叫喚稟話臣等酌令土弁阿忠前往並授以嚴切之詞預備登答嗣阿忠到卡倫外丹巴沃雜爾等稟稱伊等土司已將僧格桑拘禁欲行獻出如大人不信可差一二名兵丁往驗便知真假經阿忠等告以

天朝威力不難蕩平賊境亦無慮僧格桑逃往何處丹巴沃雜爾又以實欲獻出僧格桑爲詞並及從前十三年間准其投降不但岳鍾琪至其境內卽地方官員亦曾來往今不但不見官員入境且兵丁亦不見來惟恐乞降不允因此懷疑阿忠又斥以

天朝斷無遣人至爾境之理毋庸多言至數日後丹巴沃
雜爾又差人喊稟_臣等飭令卡兵嚴斥置之不理
至小金川降番已全移徙而竄在金川者精壯番
丁不過數百人卽僧格桑稍延殘喘亦無慮其出
而勾結况僧格桑旣已被拘則逆會之心已離索
諾木亦不便再爲放出此時大兵已尅期合剿萬
無中止則逆會再有稟詞亦不值更爲回諭均奏

入

諭曰阿桂奏分路進兵情形及籌添豐昇額處兵丁一摺
所辦俱合機宜可謂盡心籌畫而其爲豐昇額添兵一

節尤能悉秉誠心不分畛域甚屬可嘉豐昇額處兵數
既多且見阿桂如此體國奉公更當與之協力同心相
機會勦迅奏膚功計自初十日進兵至今晨已經三日
自必所向克捷佇聽喜音又奏丹巴沃雜爾差人叫喚
付之不理所見甚是從前准令金川投降一節朕深悔
所辦姑息今賊會敢如此負恩反噬不可不急爲勦滅
以除後患乃賊人尙狙於從前受降之說妄思獻出僧
格桑卽圖完事而此時猶多觀望非至窘迫之時不肯
縛獻實爲可恨各路將軍等總當如阿桂之堅持定見
設遇賊人稟籲竟不必與之交言若僧格桑到營卽併

其送來之人設法擒獲一面仍加緊進攻賊人計無所施自必易於集事

公又借色布騰巴爾珠爾奏言現在尅期進剿所有統領防兵大員自應酌定地方分駐以資控扼並爲接應大兵之用查常青熟悉軍務邊情所有小金川各處畱防事宜均應令其照料但布朗郭宗一帶係昔嶺木果木美卧溝出來之路在在逼近賊境而其後別斯滿溝又有小金川降番尙須彈壓且大兵由谷噶進剿此一帶後路綿長一切接應事宜俱關緊要常青自當於布朗郭宗底木

達駙札其美諾雖係適中之地但距賊境稍遠而
王進泰往美諾達木巴宗等處情形漸悉應令其
駐扎美諾至成果腿疾已經兩月既不能隨營打
仗若令其幫同王進泰商辦防守事宜尙爲有益
再富興脚氣發動甚屬尪羸亦應令其在布朗郭
宗幫同常青辦事如常青有往來巡查之事卽令
富興畱駐辦理均候痊愈再爲調往隨剿至南路
僧格宗一帶前經臣等奏明並知會明亮等囑其
於英泰汪騰龍內派出一員統領防兵其科多一
站旣經明亮先派兵二百名在彼防守應令派出

之員兼管臣等西路亦於科多畱兵一百名卽令王進泰管轄庶西南兩路信息相通

公又偕色布騰巴爾珠爾奏言侍衛桂林來抵美諾與富勒渾酌議糧運事宜臣等詳詢情形據桂

林稱此時南路六路分兵一切接濟糧儲隨步撥形皆須親身酌辦既不能前在丹東亦非可遙爲照料現已奏令明亮另派大員等語臣等於本年

七月內惟恐丹東兵力不敷添派川兵二百五十名合遊擊程有方帶徑幫同叅將郎摺升駐防嗣經明亮添撥川兵三百名前往吉地以壯聲援近

鄂寶又於宜喜湖廣兵內撥出三百名前往是該處已添兵八百餘名合以舊漢土官兵已二千五六百名且有副將鄭國卿叅將郎指升及程有方等均係武職大員是丹東吉地一路惟當飭令該員等在來會哨實力稽巡竟不必更派大員往駐而南路進剿道路既多自應令桂林帶領留駐章谷之兵督理一切糧運毋庸兼顧丹東均奏入

諭曰阿桂奏合常青等分防後路均著照所奏派辦又奏南路僧格宗一帶已知會明亮於英泰汪騰龍內酌派一員統兵辦理前阿桂奏及此事朕以汪騰龍專務口

給不甚足恃因派令英泰駐守僧格宗昨據明亮等奏英泰亦須帶兵隨營是僧格宗必須另派大員駐扎自應令富勒渾在彼駐守經理明亮後路事宜令汪騰龍隨其辦事至阿桂軍營糧餉富勒渾仍須實力調度隨時策應第富勒渾軍旅素未諳習如遇有關軍務番情者當札商常青妥爲籌酌并當與王進泰相商而行伊三人總當合而爲一和衷妥辦又阿桂奏章谷一帶應畱桂林駐辦之處與朕前降諭旨相合惟丹東一路鄭國卿僅係副將恐於地方呼應不靈昨已諭令文綬選派妥幹大員一人在彼辦理著文綬仍照前旨酌派奏

聞

恭錄

御製詩

上元後一日廷臣小宴

司天應爲惜華節舉首今宵月始圓
拂卜夜臨申讌啟歷
多年率未燈燃甘醪羽爵寧須再
庶品蚌盤漫笑前雖是
同堂斯愷樂良臣進勦正心懸

十八日

公偕色布騰巴爾珠爾奏言臣等於初二日已至

布朗郭宗查點滿漢各兵應帶火礮鉛彈軍械均

已齊全及十日裹糧亦均支給當卽分撥第一隊
五千餘名令海蘭察額森特普爾普保寧帶領於
初六日進發第二隊五千餘名臣色布騰巴爾珠
爾率同福康安烏什哈達特成額成德帶領於初
七日進發第三隊兵五千餘名臣阿桂率同積福
福珠里倭昇額海祿帶領於初八日進發其自布
朗郭宗喀爾薩爾應駐防兵現在常青派員帶領
兵丁隨同大兵之後遵照臣等指定地方兵數逐
處撥兵安設又自喀爾薩爾以至谷噶丫口延綿
百餘里其中如梭洛柏古等處臣另於經過時隨

地撥兵分駐並於總兵富紳六十六二人內派出
一人統領防駐其那木札伊達禮常保任帶赴凱
立葉助剿之兵二千名亦於初六日起行於初十
日必至薩爾赤鄂羅山會同豐昇額合攻臣等察
看此番進剿不獨大臣鎮將踴躍圖功卽偏裨弁
兵無不振奮思効賊酋游魂自必立時掃滅

公又奏言此次谷噶凱立葉兩路進攻恐賊人稍
有知覺是以如功噶爾拉登春前日駐兵之處益
復多張聲勢使賊人盡力於此萬不疑大兵另有
新路是谷噶一路斷不可遽爲設站安臺使賊得

以預備但此地軍營滿漢各兵均係步行非但不
比西北兩路均給馬駝馱載並不如滇省出師尙
有騾馬而每兵一人計所帶火礮鉛丸各二百出
烏鎗一桿腰刀一把火繩十盤卽已不下三十斤
又各關十日口糧計重數斤合計幾及四十斤官
兵負此四十斤之重越險攀高卽不攜帶鍋帳已
屬費力若一月口糧以八合三勺計算幾及二斗
五升兩月口糧卽幾五斗站夫每日緩行一站而
所背之米止有此數兵丁進征迅速斷不能於軍
火器械之外更裹帶如許之多臣等悉心籌酌以

麵一斤抵一日口糧做成餅餌於官兵口食既屬相同而攜帶尤爲輕便且可無庸舉火又以在前勁銳之兵疾趨掩襲愈速愈佳並於一隊之中又分三隊通融攜帶使在前之兵乘勝直入接踵之兵亦可遞來庶於兵食既無不繼之憂而從前銳兵益爲輕利至此大進攻事事皆須妥辦亦事事皆關機密前此將進攻道路日期酌量籌定未嘗不可將辦理夫糧之法通知富勒渾但此非一人所能獨辦必行總理司道而司道等又必轉飭各糧員勢將胥役夫頭盡皆知悉實不免於泄漏機

宜是以臣先時並未通知第熟計此路應設若干站每站應需若干夫只令富勒渾等上緊籌備均可敷用俟官兵將次見敵之時始令總理大員帶領人夫邁行安設查布朗郭宗前抵谷噶計程約共八九糧站自初九日起每日計安兩站至十三日即可安設齊全而兵丁所支自初六日起裹帶口糧是時將屆用完亦適足以接濟

公又奏言據王進泰成果報稱有博羅克守卡將弁將自金川投出之小金川番人斯塔克達爾得實爾根闡勒等三名解赴大營臣等訊明俱係小

金川覺寨人金川頭人帶伊等在南路放卡因大
兵到來押往金川家眷並未同去今潛行逃出等
語查覺寨地方本係賊目七圖安都爾所管是以
將該寨降番眷屬均發瓦寺土司收管今斯塔克
達爾等所供父母親屬查對降番底冊俱屬相符
當將斯塔克達爾等交與隨營瓦寺頭人派人押
往令與家屬見面後仍卽來營差遣均奏入

諭曰阿桂等奏布朗郭宗派兵分隊進剿情形又據明亮
等奏在格藏橋分路撥兵進攻事宜所辦俱極妥協而
阿桂另摺所奏各件均屬實心籌畫又阿桂奏據王進

泰等報稱博羅克守卡將弁將投出番人斯塔克達爾等解送大營是賊番於小路潛出並非難事恐其借名投降暗藏奸計自當早爲防守若於隘口見有形跡可疑者卽當立時剿殺既可多殲賊衆且使賊人知所畏懼不敢妄圖軼出王進泰常青等均當一體妥辦

公又奏言查金川賊人以內地土司悖恩反噬此其罪大惡極不可不滅惟臣知之最真故必期殄滅之心亦惟臣守之獨力惟是此地用兵兵多而路多則收功倍速是以臣前此請添兵力爲將來乘其不意出奇直搗之計今蒙

聖訓以再添一二萬兵亦非難事只期大功必成多費亦所不惜仰見

洞燭機宜片言居要今臣就現在兵力酌量派撥進剿仰

荷

皇上威福自可易於采入但此後再有分用之兵乘四面環攻賊人支禦不暇之時搗虛直入則更可以制其死命較之兵少而多需時日者爲費轉有節省

奏入

諭曰阿桂奏就現在兵力派撥進剿自可易於采入此後倘得分用之兵搗虛直入更可以制其死命等語前因

美諾一帶後路兵少會諭調荊州駐防兵一千湖廣綠營兵一千赴美諾等處備用節據阿桂等奏各處畱防約計五千餘名是後路之兵已足敷用無藉復待集兵此次二千兵俱係生力軍若用以攻剿必當得力昨據陳輝祖等奏前項二千兵已於臘月二十九正月初二日全行出境計其到川甚速若將此項兵丁歸於阿桂軍營畱爲另覓新路分道進剿之用自屬得濟著傳諭文綬於此項兵丁到省時卽令遄赴布朗郭宗聽用並令阿桂籌畫辦理一面奏聞

二十三日

公借色布騰巴爾珠爾奏言臣等派撥官兵分隊

啟行之後海蘭察額森特帶領第一隊官兵於初

九日辰刻卽已進至谷噶山梁丫口下埋伏賊人

並未知覺至酉刻忽見丫口有賊五名向上行走

似係哨探之人海蘭察惟恐賊人得信親帶數人

趕上鎗斃一人其餘竄入林箐而逸臣等思逸賊

必回通信其勢不可稍遲因察看谷噶山梁之外

又有橫梁一道地名喇穆喇穆峯巒峻險路仄溝

深因令海蘭察與保寧帶兵二千由此繞進又令

額森特普爾普帶兵三千從正路進攻臣色布騰

巴爾珠爾復派兵一千五百名令烏什哈達帶領
爲海蘭察等接應又派兵一千名令成德帶領爲
額森特等接應額森特等卽於初十日子刻搶過
丫口過溝往上攀越維時風雪大作官兵毫無畏
避官兵穿林越險直前奮擊賊人雖亦放鎗抵禦
因官兵勇猛勢不能支且戰且退官兵節節攻擊
直至黎明轉戰二十餘里賊皆奔竄察看喇穆喇穆
高峯橫列上有大礮九座築在各峯之上中間又
攔以石牆其地本有積雪是夜五更後又降大雪
官兵轉乘此雪霧迷漫前進直抵礮根賊人不及

放鎗僅能拋石下擊緣礮根堅厚又有冰雪凍凝
刨挖不入而礮頂係石片蓋成又有積雪拋擲火
彈亦不能燒恐官兵遲久受傷因而暫撤預令滿
洲吉林索倫等勁兵埋伏誘令賊衆出礮乃賊因
夜間野戰受傷不敢出礮抗拒遂將喇穆喇穆之
左右兩面山梁及附近之贊巴拉克各山峯分兵
搶據除夜間殲賊不計外共計殺死三十餘人並
割獻首級二顆是日未刻天氣稍晴額森特見喇
穆喇穆之東色依谷山高出此諸山之上有賊在
彼拒守卽於是夜帶兵襲取出其不意賊人四散

竄逸我兵追殲數賊墮落崖礮者甚衆又將色依
谷山佔據已與對面山梁海蘭察之兵通路接應
其海蘭察等繞截之處道路有七八十里之遠臣
等又已派兵一千前往接續又據海蘭察等報稱
十一日五更發兵二千往搶賊人所據最高之登
古山路逕險滑官兵手足並用四面同登現在進
攻對面山腿賊寨等語臣等查谷噶丫口本與木
果木功噶爾拉當噶爾拉同此一帶山梁其險惡
情形亦皆無異今乘其不備進行無阻且額森特
之兵已佔據色依山谷海蘭察之兵已佔據登古

山相距不遠聲息相通若竟能從此繞進則喇穆喇穆之賊固守亦爲無益轉不必爭此險礪現在色依谷登古高峰已望見宜喜山梁又望南路之克丹九寨及馬爾邦等處隱隱見有烟火其登古山相對之處亦已見凱立葉山梁上有兵行走軍威甚盛賊酋必先胆落至官兵自谷噶溝口進至梭洛柏古卽係金川地方至海蘭察所攻之地計入賊境已有一百餘里惟是進谷噶溝口以來箐林深密道路叢雜而贊巴拉克喇穆喇穆各處道路尤多實不無多分兵力查楸砥一處運道已密

札松茂道查禮開修此道一通并續調防後之川
楚兵丁到日卽將布朗郭宗瑪爾當等處防兵內
抽出二三千名并爲接濟攻剿之用自更得勢奏
入

諭曰此次阿桂明亮等分路進剿同時並發於一二日內
乘賊不備迅克要隘山梁搶占木城碉寨賊衆望風奔
潰殲戮甚多阿桂等悉心調度動協機宜而領兵各員
協力進攻均能所向克捷著先賞荷包以示鼓勵仍令
該將軍等查明在事出力之將領弁員同將軍參贊一
併交部議叙至兩路滿漢屯土兵丁不避冰雪攀越山

險奪礮攻礮無不爭先踴躍實屬出力可嘉著阿桂明
亮查照伊等應得分例加賞一月錢糧以示體卹

恭錄

御製詩

聞兩路軍營攻得要隘信至詩以誌事

兩路馳軍報一朝得喜音

明亮以正月十一日在馬尼報捷阿桂以正月十二日在谷噶

報捷俱於二

谷噶

讀作平聲

既采入

阿桂等奏於正月初十日派兵搶過谷噶

估其山梁三四處連得礮

馬尼

去聲並深侵明亮奏初十日

卡已入賊境一百餘里

之前攻得礮卡殺賊二十七人賊目一人富德截出馬尼

之後攻克壘口二礮搶奪木城殺賊三十餘和隆武於卡

卡角亦攻得二礮與明亮兵合而對河之德喇布亦攻得

賊寨四十餘處馬尼中山梁五礮諸賊悉潰奎林以皮船

渡至博堵亦得
其木城二座
雪冒如平蔡
海蘭察等所統官兵自谷嘴

作官兵穿林越險奮勇直前轉戰二十餘里五更後又復
大雪官兵轉乘雪霧迷漫直抵礮根除黑夜殲斃賊人不

計外共殺火騰卜尅金
明大礮賊放鎗抵禦官兵不避危
賊三十餘

險蜂擁而上於西面挖開石脚拋擲火彈復於東南角舉
藤牌掩蔽穴地實以火藥地雷轟發礮牆隨圮賊大半壓

死餘亦皆殲斃
旗兵真識義屯卒亦輸忱
此為出力皆由八旗勁旅

奮勇先登緣營兵觀感激勵並效法
奮勉咸敵愾公膺期
恐後而屯土兵練亦各踴躍用命

就擒詎寧斬重賞
在事出力之滿漢屯土各兵俱加賞一
月錢糧並令將軍等查明分給寧濫毋

遺實用勵同心崇嶺彼失據
先是海蘭察等於初九日辰
時即在谷嘴山梁了口下埋

伏賊人並未知覺至酉時見了口下有賊五人海蘭察追
躡之鎗殲其一餘皆竄逸恐其至賊營送信因擬於喇穆

喇穆橫嶺外分路進攻佔其左右山梁及相近之蠻巴拉
克山峯額森特亦據嶺東之色依谷山梁海蘭察又佔最

高之登山梁山賊於此等要隘未預爲守窮巢我四尋雖

禦今大兵皆入丫口賊已自失其險矣兩路官軍所向克捷實賴然宜戒滿籌筆倍生欽嘉獲予惟益凜滿盈之戒以欽承

上蒼

佑耳

二十七日

公偕色布騰巴爾珠爾奏言大兵所駐地方本在山峯最高之處臣等於十三日攻取登古對面山

梁合海蘭察普爾普等帶兵兩路前進保寧海祿帶兵接應兩路俱於丑刻潛進時風雪大作官兵奮速向前一擁而上乘其不備攻克頭卡隨乘勝直入攻第二三四卡賊措手不及均經攻克餘賊

竄入第五高峯卡內官兵合力尾追時有吉林委署防禦八十七鎗矢連發斃賊十餘人漢土官兵勇氣倍增向上衝殺仍遁入卡內維時喇穆喇穆礮內有賊百餘踰溝接應又被索倫兵衝斷圍射殲戮甚多查第五峯礮卡雖因峯高石大未經攻克臣等察看情形尙可繞越圍截設法辦理俟兵丁稍爲憩息卽併力奮攻務期得手

公又奏言臣等前准明亮抄送分防後路摺稿並將所繪圖說寄知其所派翁古爾壘等七處各畱兵二百名得勝橋等三處各畱兵一百名爲數原

未免零星惟是番地重山複嶺道路叢雜要地設有重兵而其餘數十百里內可通賊境之處若無兵接濟則於運道文報糧餉等事聲勢不能聯絡既議駐兵卽不得不節節畱防至功噶爾拉當噶爾拉二處山勢延長官兵二千非但難於攻撲并不足以資牽綴而功噶爾拉後路如崇德牛廠簇拉角克又須步步畱兵轉減大兵進剿之力今臣自美諾至谷噶後路畱兵合計數千均就至要之地並再三酌減已有此數是以臣前奏或俟續調之川楚各兵到日再將底木達一帶防兵抽撤一

二千應用

公又奏言竊查綽斯甲布糧運本有兩路一從打箭爐出口自噶爾塔爾資隆經由草地雇募烏拉前運木池一從維關出口經過梭磨卓克采從噶克丹壩地方前至綽斯甲布今豐昇額既從卓克采前至凱立葉則所有自維關運出之糧一至卓克采地方即可令其由岔道前赴凱立葉軍營只須增添數站較之運至綽斯甲布省費已多至

臣

現令查禮所開楸砥運道此路軍糧亦即從維關運出因其道路甚捷較之西路由桃關卧龍關明

郭宗布朗郭宗等處運至谷噶脚價大有節省俟
楸砥運道一開即將西路卧龍關一帶糧運酌量
停止均奏入

諭曰阿桂等奏十三日分路進攻喇穆喇穆連取石卡四
處殲戮賊人實爲痛快所有在事之將弁俱著記明功
績再行交部議叙又據稱第五賊卡峯高石大尙可繞
越圍截設法辦理所見甚是斷不可在其正面冒險攻
撲以致徒勞至谷噶丫口與功噶爾拉同一山梁恐賊
人潛循岡隴來截我兵之後今據阿桂奏自美諾至谷
噶後路畱駐之兵合計數千是已於緊要後路俱經畱

兵防禦可無他慮昨據文綬奏楚兵到成都已於正月十六日起程前赴美諾計日內即可到齊底木達一帶防兵卽毋庸再爲抽撤阿桂當酌量何處尙需添兵若干卽就近妥協派撥仍行奏聞若調至軍營并力合攻亦無不可又奏稱金川番人思丹巴前來投順訊係由木果木而來自非虛捏是木果木爲金川往來要地賊若從此潛出卽不難至底木達大板昭等處此乃阿桂軍營緊要後路不可不實力嚴防著交常青等於此等要隘切實防範時刻巡查不可稍有疎懈其美諾僧格宗等處有應互相照應者常青卽就近札知王進泰成

果並飭汪騰龍畱心妥辦又阿桂另摺奏凱立葉一路現用鄂寶由卓克采運往之糧較之西路糧運頗爲近便若楸砥之路一通則較卓克采運費更可節省等語是楸砥運道於谷噶凱立葉俱屬有益自當上緊辦理著交富勒渾鄂寶熟商妥辦

二月初二日

諭曰昨諭阿桂挑赴後路之成都駐防兵三百名卽行酌調並將綠營川兵一千三百酌派各路防守今思川兵雖於攻勦非宜而看守尙堪備數阿桂畱於布朗郭宗一帶防兵計四五千名其中儘有可充攻勦之用者莫

若將新往之兵作爲分防於阿桂舊留防兵內如數換出派赴阿桂明亮兩路應用以此兩項新兵添派兩路更爲得力著阿桂卽速核定分撥著常青等妥爲更調奏聞

初六日

公偕色布騰巴爾珠爾奏言查喇穆喇穆山梁爲賊番緊要門戶今海蘭察之兵已繞過其左佔據登古山梁卽不難繞截喇穆喇穆之後但有登古對面高峯驟難攻克而其下尙有可繞之路若從此繞出不但該處礪卡賊難據守而喇穆喇穆之

賊見大兵已越至險之地亦必不攻自潰惟此一
帶山梁本係當噶爾拉功噶爾拉一脈氣候亦相
似與明亮由馬奈等處沿河進兵者不同數日來
雨雪連綿層冰凍滑官兵立脚爲難但自登古對
面高峯而下不十餘里卽出積雪之地現在各官
兵等鑿冰冒雪搬石砍木甚爲踴躍以爲一過此
隘則地勢漸平天氣漸暖勒烏圍賊巢在望不難
計日掃平並不煩臣等嚴加督飭其剴立葉一路
臣等斜望該山形勢較爲切近詢之番人均稱有
路繞越不難措手查有久經投出之金川番人策

旺伊生長凱立葉地方路徑情形較爲熟悉因令其前赴豐昇額軍營以資嚮導茲於二十三日天色已晴臣等卽於日內督率攻勦奏入

諭曰前以阿桂從谷噶丫口深入其後路最關緊要復因豐昇額奏凱立葉一路攻進稍難曾令其統兵赴谷噶一帶爲阿桂助勦聲援今阿桂又遣熟識路徑久經投出之番人策旺前赴豐昇額軍營以資嚮導凱立葉既有路可繞復添嚮導之人自可乘閒攻克與阿桂會合進攻但六七千里外軍務機宜究難懸定阿桂豐昇額惟當斟酌妥爲之仍將作何定見之處迅速覆奏惟是

數日以來朕日夕盼望竟至中夜無寐將軍等豈可不體朕宵旰焦勞之意嗣後間四五日奏事一次勿稍遲緩

十二日

公奏言臣前因楸砥一路本距內地較近一切糧運道近而費省是以飭令松茂道查禮相度開通今據該道報稱尅期分段開修已於二十四日竣工糧夫人馬皆可通行計自桃關至楸砥又自楸砥至大板昭較之西路自桃關而卧龍關明郭宗以至大板昭近至十有餘站每米一石可以節省

五六兩等語查運道改至楸砥兵糧腳價節省既多而卧龍關明郭宗布朗郭宗一帶二十餘站人夫皆可大加裁減所省尤爲無算且自楸砥直運至凱立葉又較之由楸砥而繞至卓克采再運凱立葉者亦多減省但必俟楸砥糧運大通凱立葉軍糧始可取資於此則該處臺站人夫自不可不急爲安設但由內地應運之糧迄今運出者甚少亦未撥給人夫應用查楸砥一路此時僅有查禮所雇開路番夫千人業經富勒渾飛檄飭令暫畱在站而底木達布朗郭宗一帶站夫又必俟楸砥

臺站安設之後始堪捲撤應用今道路雖通而夫糧不到仍何以節帑項而裕軍儲臣現已飛檄文綬趕辦奏入

諭曰楸砥新路既已趕修完竣其臺站人夫自宜急爲妥設以利轉輸前據文綬奏稱已於正月二十八日前赴楸砥會同劉秉恬查辦新路夫糧事宜何以此時尙未運到且截畱在站之夫亦祇有查禮雇番夫千名其何以供兩路軍糧之用前已有旨令文綬卽回省城辦事著傳諭該署督卽速督飭所屬上緊趕運俾得源源接濟毋稍遲悞

公又奏言查瓦寺鄂克什三雜谷丹壩綽斯甲布
巴旺布拉克底兩金川各處均謂之甲壘其番人
言語不惟與西藏之唐古忒迥殊卽與南路之明
正各土司亦須通譯臣處繙譯番字向不用綠營
字識惟有屯弁安布木一人小心老實凡有番稟
皆派出章京眼同閱看令屯弁通事逐句念出卽
逐句寫清似不敢有增減之弊去冬復收小金川
之先早已檄調三雜谷土兵直至大兵業將小金
川全境收復始行聞信趕來伊等亦深知愧懼亟
思有以自白故此番進勦願爲出力臣因此量加

獎賞該頭人等深爲忻悅而該土司并囑所屬之
目兵向後倍加出力現在楸砥運道不日可通則
峇噶凱立葉兩處後路均在梭磨境內其土婦卓
爾瑪甚爲可信且距內境益近離賊境益遠後路
斷無阻碍奏入報

聞

十三日

公偕色布騰巴爾珠爾奏言臣等督率官兵攻擊

登古對面高峯近詢土人地方博羅瓦若從迎面
直攻殊難得手今訪得高峯陽坡之旁有路可繞

出賊礮之後而此一路石大溝深積雪極厚賊人
不料我兵越險前往是以尙未設備臣等前已派
兵五路定於二十八日子刻進攻而是夜雪勢更
大因而停止連日或晝或夜必有一二次大雪自
尺許至數寸不等官兵實難措手查自登古進攻
實爲金川險隘若非審度天時地利爲萬分必得
之計遽行輕舉妄動賊人一有知覺其勢轉難籌
辦應俟有二三日之晴冰雪稍爲融化密速發兵
必能采入再臣前奉

諭旨令將楚兵二千歸於臣等軍營畱爲另覓新路分道

進剿之用但明亮處現分河南河北兩路進攻急
藉官兵助剿臣不敢稍分畛域此項楚兵應請卽
赴南路軍營應用現咨富勒渾文綬等照此辦理

奏入

諭曰阿桂等奏籌度進剿情形一摺只可如此辦理行兵
當籌畫萬全原不宜輕舉妄動該處正值冰雪凝寒自
當速祈晴霽阿桂宜秉誠致敬以邀

眷佑

又奏明亮待兵迫切已將楚兵二千全往南路是明
亮處頗添此二千生力兵自爲得力明亮或將所添新
兵進攻馬爾邦或令富德帶往攻取當噶爾拉或令派

赴奎林處併攻斯第博堵著照該處實在情形速行籌辦

二十一日

公偕色布騰巴爾珠爾奏言查

臣

等軍營後路自

美諾以至喀爾薩爾所派兵數既較倍上年駐兵之地亦較得勢而谷噶溝口及梭洛柏古一帶已派總兵富紳在彼專駐其前敵之牛厰等處路通梭洛柏古大板昭亦派官兵嚴守

臣

於丫口進攻後處處籌畫雷兵聲勢均為聯絡實不慮賊人覬覦且此時楸砥一路業已開通設站安夫不日卽

能集事則谷噶後路實在梭磨境內將來摺報往來卽由此一帶行走梭磨在三雜谷中尤爲恭順卽豐昇額後路俱在卓克采境內該土司畏威思一効亦屬可信無虞其明亮後路均於巴旺布拉克底及明正土司境內行走臣復札知自省由雅州打箭爐以至章谷較之自省由卧龍關美諾以至章谷計程不過多二三站文報往來不過遲半日此打箭爐一路原設馬臺並未裁去若將摺報從此馳遞更可遄行至臣熟察羅博瓦一帶形勢必能繞歷直下一得格魯瓦覺則於凱立葉下面山

腿相距匪遙臣若得兵二三千人從凱立葉山腿
迤邐斜上前後來攻亦能接豐昇額之兵倘不能
辦卽當仰遵

聖諭令豐昇額酌派幹員在彼牽綴而自統兵六七千名
前來會攻勒烏圍更可成掃穴犁庭之勢但此時
豐昇額處正在合力夾攻自可毋庸移動奏入

諭曰阿桂奏籌防後路一摺悉合機宜朕於阿桂進兵後
晝夜以此繫念今覽所奏各後路防範俱能切實稍寬
慰懷前令豐昇額以凱立葉不能迅進莫若統兵至峇
噶一帶爲阿桂聲援繼因豐昇額已得嚮導且覓有進

兵之路復諭令豐昇額如現有機可乘卽不必另爲移
動今阿桂復以采入時後路畱防爲計自當酌調豐昇
額相助著阿桂與豐昇額妥酌而行

公又偕色布騰巴爾珠爾奏言楸砥一路實爲近
捷是以臣等飭令查禮開修又安弁步行前往看
視據稱此路不過一百五六十里其中橫嶺一道
上下止有十餘里續又據查禮稟稱糧路業已開
修人夫騾馬均可通行等語是此路轉運軍糧並
無妨礙且臣等所急於開修者不但程途較近實
以經由帛噶爾角克布朗郭宗等處俱與賊境相

近倘有夾壩站上怯懦兵夫易於搖惑亦屬非宜
今改由楸砥則後路皆在梭磨境內一切均可無
虞况此糧運較之從西路運供每米一石既可省
銀五六兩則谷噶一路兵夫口糧卽以每月萬石
計算已省銀五萬有餘楸砥一日早開更省一日
虛糜之費奏入

上嘉之

二十九日

公偕色布騰巴爾珠爾奏言查登古對面之羅博
瓦山峯巒起伏皆有賊人礮卡但高峯大卡之後

尚有兩峯突起若派兵從登古丫口潛繞其後於兩峯占得一峯則羅博瓦高峯必不能死守而賊並失其喇穆喇穆之險惟此一帶山勢在在迴環彎曲賊旣均可望見卽可互爲接應是以臣等前已奏明酌定五路進兵因令福康安海祿帶兵進攻喇穆喇穆迤西各礮普爾普等進攻羅博瓦山峯礮卡特成額等於喇穆喇穆迤東山腿進攻以牽賊勢其海蘭察額森特帶兵繞出羅博瓦最後一峯對面地方以絕賊人來援又登古丫口之下有淖爾一處在羅博瓦及喇穆喇穆中間令烏什

哈達保寧等帶兵聯絡聲援十一日積雪雖未全消而天色已經晴霽卽於十二日亥刻分隊起發兵丁皆由石罅循行或彼此以手接引跳越而過比及黎明普爾普率同侍衛柏凌等順羅博瓦山梁而進將至礮下見礮外有伏賊卽拋擲火彈焚燒賊衆俱遁入礮我兵直抵礮下將往來救應之賊殺死五名其福康安海祿攻喇穆喇穆之兵又分兩隊前進搶獲石卡一座殺賊三名其餘賊衆十餘名滾崖遁竄戎兵乘勝進取第二石卡卡內賊衆竄往喇穆喇穆高峯大礮官兵鎗箭齊發擊

斃數人其特成額成德六十六等帶兵在喇穆喇
穆迤東山腿上分爲兩路牽綴亦擊殺哨探賊衆
數人維時海蘭察額森特帶兵行走處處攀越賊
已知覺將鎗礮排列於羅博瓦及喇穆喇穆之上
盡力施放並有潛伏林箐中用鎗擊打者官兵毫
無旁顧直前進發至第三峯下將循山腿而登有
賊二三百名從山梁壓下海蘭察奮力迎戰賊退
一步我兵卽進一步正在鏖戰間其山下林中伏
賊突出欲行衝截海蘭察畱後之兵合力迎擊賊
人來而復潰者兩次頃之又有賊人分爲三股拚

死衝突皆被擊敗約殲戮四五十人帶箭逃者尤
衆此數次接仗箭最得力賊見持弓追趕者往往
倒身抱頸從險崖滾落以冀幸生至海蘭察等處
戰之兵併力仰攻山勢愈上愈險尙有積雪數寸
且天已抵暮勢難搶佔當將兵暫撤與額森特烏
什哈達保寧等會兵一處分隊露處以冀賊人前
來偷劫可以再加殲戮而賊因日間痛殲之故惟
於遠處放礮並不敢近前侵擾此次殺賊共計七
十餘名而我兵受傷無幾惟侍衛庫爾德受傷四
川千總張魁陣亡現在查明咨部請卹奏入

諭曰阿桂等奏攻打羅博瓦山官兵奮勇殺賊其中射斃者尤多可見滿洲索倫之得力惜賊番每在礮內藏匿若能引出礮外使得益展我弓箭之利則更善耳此次進攻羅博瓦時官兵有從凍石中跳越而過者并有經賊人林內放鎗而官兵毫無旁顧其勞績茂著者甚衆實爲出力可嘉著阿桂查明登記檔案俟攻得要隘時一併奏聞交部議叙其有出力超衆者卽奏明以示鼓勵其陣亡之千總張魁及受傷之侍衛庫爾德等并著查明咨部辦理至於官兵之奮勇立功由於帶兵之將領董率得宜而實由於將軍之規畫有方均堪嘉尚著

賞阿桂荷包四枚火鏢一件色布騰巴爾珠爾荷包三枚火鏢一件福康安海蘭察普爾普額森特等四人各荷包二枚火鏢一件烏什哈達保寧特成額海祿成德六十六等六人各荷包一枚火鏢一件卽隨報發往以示獎勵至阿桂此次非但措置悉合機宜且胸有成算志在必滅金川所籌悉與朕見脗合阿桂如此誠心出力實不負元戎重寄朕適駐蹕盤山卽以行程所佩鏤文刮鯨囊解賜以寓一體聯合之恩眷

三月初三日

公偕色布騰巴爾珠爾奏言查羅博瓦前面山峯

賊番恃險固守度大兵未必來攻而前此已從其
下繞道前進或疑大兵意不在此防備稍疎亦未
可定當於十七日夜派撥滿漢屯土官兵分路前
進海蘭察額森特帶兵從正路攻羅博瓦前面山
峯官兵奮勇前進直抵礮下賊番鎗石俱發其小
金川降番先已潛繞賊礮之後始見又有一礮相
距甚近而兩礮中間又有一大石卡賊番聚此以
爲兩礮應援之地我兵同土兵出其不意突然搶
入砍殺殆盡其有出卡逃竄者亦被官兵追及共
殺賊三十餘名前後官兵合力攻圍大礮拋擲火

彈挖掘礮根忽有賊二百餘來援經侍衛岱三保
達蘭泰等迎擊亦殲三十餘名餘賊入礮併力固
守其右首梁下又有賊二百餘斜衝而上亦被章
京瑚尼爾圖侍衛額爾特等迎擊斃賊十餘餘賊
潰遁臣等誠恐官兵奮攻羅博瓦山峯礮卡則後
兩峯之賊喇穆喇穆之賊均必前來接應因令烏
什哈達保寧等帶兵從登古丫口下至有淖爾之
處以斷來援至是果有賊百餘名從喇穆喇穆衝
來截官兵後路經叅將常住遊擊李煦督兵迎敵
烏什哈達等亦乘勢夾攻賊番被殲及落崖者甚

衆其普爾普帶兵繞攻羅博瓦後丫口礮卡亦於是時派令章京索住等從礮下山均繞道襲取而自行帶兵迤邐斜上遇賊奮力衝擊賊雖敗退仍於至險至仄路口滾石放鎗官兵相持甚久而海蘭察等官兵在賊卡間攻撲者賊於兩礮內鎗石俱發刨挖礮根之官兵不無傷損難以久站比至天色漸明各隊官兵緩緩撤下其福康安海祿等帶兵攻打木城對面喇穆喇穆高礮鎗矢並施斃賊五六名至特成額成德等因各路官兵進攻派令都司鄭啟榮帶兵由喇穆喇穆左首山溝小路

前進自率侍衛伊里布等接應鄭啟榮聞羅博瓦
山峯打仗聲響帶兵先進直抵賊番冷卡之前其
中數賊俱被官兵殺死並獲活口一名此次殺賊
八九十名我官兵內惟章京索柱得有石傷護軍
校七十五得有鎗傷其餘兵丁亦有陣亡受傷者
俟查明咨部核辦現在天色已晴臣等另踴道路
於一二日間奮速進攻以期采入

公又偕色布騰巴爾珠爾奏言查小金川地方西
起約咱東至大板昭河北一帶在在與金川接壤
其布朗郭宗底木達係美卧溝及簇拉角克出路

美諾係功噶爾拉出路僧格宗係當噶爾拉出路
現在俱有大兵分駐控制不爲不密此時卽偶有
夾壩不過去冬大兵未到之先小金川番人竄往
金川者旣無口食可資三五爲羣潛行搶掠卽加
倍添兵駐守亦不能保其必無况南路摺報由打
箭爐雅州而至省較由美諾桃關而至省僅多兩
站臣等早已札知明亮等囑其所發摺報仍由打
箭爐往來旣無可虞而臣等摺報改由楸砥道行
更爲穩捷至谷噶馬尼兩路軍書來往由布朗郭
宗美諾僧格宗遞送聲息俱可相通然此一路本

只四五百里而其間應加防範者亦不過數站酌
令兵壯黑夜暫停行走而日間加緊趨行亦不至
有遲悞均奏入

諭曰阿桂等奏分路繞攻羅博瓦山峯情形一摺深爲嘉
慰阿桂自進兵以來實心調度悉合機宜軍聲倍壯所
至奏績宜威佇盼成功茂膺渥典其海蘭察所帶之小
金川降番於攻碉時潛密先往認真出力自應查明獎
賞以勵其餘至滿洲索倫之奮勇殺賊及綠營屯土各
兵有踴躍爭先者並應確查具奏候朕另降恩旨將士
等聞知自必更加感激鼓舞其章京索柱護軍校七十

五得有鎗石各傷亦應查明與傷亡兵丁一併咨部核辦至另摺覆奏籌辦後路事宜極爲周妥看來此路乘勝采入大有可恃而豐昇額籌攻凱立葉昨據奏稱踴有可通之路此時如已攻得固好否則阿桂處一經攻克羅博瓦山可以順勢壓下其凱立葉之賊自必不攻而潰惟明亮一路欲進攻庚額特礮位業已鑄成未知施用後效驗何如又楚兵二千作何分派甚爲懸憶著各將得勝情形迅速馳奏

初七日

公偕色布騰巴爾珠爾奏言查羅博瓦一山最關

緊要必當從此進攻始得建瓴之勢因於二十三
日派撥官兵乘夜陸續進發海蘭察達蘭泰等帶
兵繞至第二第三峯丫口之下於黎明時分兵分
五股爬越而登賊番知覺集衆下衝勢甚勇猛官
兵內雖有被滾石打中者並不稍爲移動俟其衝
近之時持滿而發無不應弦卽倒賊見我兵所佔
地勢已與相等兩處夾攻勢不能支始行敗退我
兵上緊追殺直上山梁海蘭察遂一面留兵佔據
丫口礮卡一面往搶第三峯第四峯及第四峯下
突起一岡將各礮卡盡行攻克並殲戮賊番甚多

其額森特烏什哈達等兵接踵而至圍攻第二峯
礪卡亦至晚克獲殲斃無遺賊衆因後路已斷轉
竄入第一山峯礪卡合力死守先是額森特烏什
哈達海祿等兵由淖爾一處接踵前行突有賊百
餘從溝內前來攔截章京花連保等帶兵迎擊其
餘官兵前後衝截將賊番圍住於山迴路轉之處
殲戮更爲不少餘俱竄入樹林兩卡內拒守官兵
三路合力進攻喇穆喇穆忽見礪後有賊數十欲
往羅博瓦救援當卽截殺數名餘皆竄逸至普爾
普等所攻羅博瓦前面第一峯礪卡我兵乘勝之

後合力飛騰上撲拋入火彈噴筒或挖掘礮根或攀援而上於二十四日亥刻攻開賊除殲斃之外滾落崖溝及被火燒死者尤衆遂將四峯全克此次共克大礮八座大小二十六卡殺賊二百餘並大頭人阿讓星格申則二名亦均殺死查喇穆喇穆係賊酋緊要門戶今將羅博瓦全行攻克已距遜克爾宗不遠原可直下衝壓但喇穆喇穆之賊尙與勒烏圍有路可通則後路未清於運糧往來亦須顧慮自應將喇穆喇穆之賊一併掃除則各處防兵又可量撤爲進剿之兵庶直壓遜克爾宗

聲勢倍爲壯盛查羅博瓦對面山梁卽係喇穆喇
穆後路臣等現擬發兵從此截斷勢必不攻自潰

奏入

諭曰羅博瓦爲賊會緊要近捷門戶屢經阿桂等相機進
剿今復將其山峯全行佔住殲賊甚多皆由阿桂調度
有方將領等奮勇直前海蘭察普爾普額森特尤爲出
衆故能所向克捷實屬可嘉阿桂著晉階太子太保以
示獎勵

恭錄

御製詩

將軍阿桂奏報攻克羅博瓦山礪痛殲賊衆相機進
勦詩以誌事

羅博瓦最高四峯五圍擁危石鎖巖芽冰巖滑龍嵒賊緊
要門戶死守弗開空然勢在必取將軍申戒董八旗子弟

兵其中多將種心旣堅忠義力倍加拳勇偏伍與彌縫部

署勞洞洞阿桂奏羅博瓦山最高緊要此一路必當竭力

九百名攻第二第三山峯中開丫口以截斷賊人歸路又

令額森特烏什哈達帶兵在後續進海勝保寧之兵又繼

之普爾普仍攻羅博瓦之前山峯福康安致喇穆喇穆夜

大礪又令特成額成德等由左邊山溝潛進以牽賊勢夜
發曉將及賊聚拒衝湧據高直下擣我師屹弗動待其近

至前持滿無不中叶綠旗及土練激勵均躍踴履險如席

平騰高擬鳥獲刀矛短兵接賊敗不旋踵隴種奔案角悞
跟逃穴孔兩日克八礮廿六卡獲冗賊巢斯已近一鼓期
收總廿三日三更傳令軍士進發將及黎明官兵分爲五
衝勢甚兇猛官兵內雖有被石滾傷之人並不稍爲移動
俟賊人衝近持滿而發無不應弦卽倒既近則刀矛短接
傷斃亦多賊人勢不能支始行敗退官兵上緊追殺直上
山梁賊衆除殺死外并有抱頭滾落崖下箐中者海蘭察
一面估據丫口礮卡一面往捨三四峯及峯下一岡礮卡
盡行攻克普爾普督兵攻打兩夜意氣騰上攻開礮座統
計殲賊二百餘促浸頭人二名攻克大礮八座大小二十
六卡捨獲礮位火藥鉛丸甚多距遜克小礮不遠五六里俯
瞰賊人礮卡竟可直下衝壓擬從羅博瓦對面山梁發兵
截斷其後賊自不攻自潰長驅直入更爲得力阿桂調度
有方諸將領亦奮勉出力因晉阿桂太子太保海蘭察授
內大臣普爾普額森特授散秩大臣並賞荷包有差佇俟
功成然予更有思好生承

天寵逸德玉石焚佳兵誠宜奉渠魁所弗赦務從實情

諭之令歸命倒戈或陰拱官兵殺賊甚多賊必心生畏懼
諭將軍等及賊番驚怯之時開誠曉諭以此事由于逆會
之負恩反噬罪在不赦與諸番無涉番衆中如有能設法
擒獲索諾木及莎羅奔兄弟並其姑阿青頭人丹巴沃雜
爾等至軍門來獻者奏聞另加賞錄如能棄逆投降者亦
可貸其一死各予安插諸番如果明於順逆禍福自求可
生之機既覺事半功倍且可免致玉石俱焚方合朕好生
之心誅殺既弗亟成功庶速鞏寄諭相咨諏慎事惟虛竦

十二日

公偕色布騰巴爾珠爾奏言臣等查羅博瓦各峯
業經官兵攻得則進攻遜克爾宗格魯瓦覺皆係
居高臨下原爲得勢惟第四峯下突起一岡而是

岡迤邐而下又分三股中間林箐深黑其旁亦係
陡崖是日官兵因深入賊境將各緊要地方分頭
築卡于二十五日遙見林箐中有烟火且見賊番
搬運木石臣等派兵于二十六日黎明進攻林中
有大小木城四座石礮二座其外又衛以石卡海
蘭察額森特烏什哈達等帶兵分爲兩翼繞進遇
賊三百餘人突出拒敵我兵乘勢衝壓連搶石卡
三座併分兩翼圍困木城賊復聚集多人潛匿林
中欲截我兵之後滿洲索倫官兵回身奮擊亦多
殲殪但此四木城兩礮內放鎗皆可相及我兵未

免受傷且因天暮暫撤此次攻剿共殲賊八九十
名並殺頭人二名據小金川番人稱一名阿布波
烈係得斯東寨頭人一名格楞布係勒烏圍喇嘛
頭人爲莎羅奔岡達克所最任用者至我官兵內
惟藍翎侍衛綽爾齊喀陣亡臣等察看木城石礮
宜用大礮轟摧撲取始易爲力且此處尙有可繞
進之路現在相機辦理以期迅速竄入奏入報

聞

公又偕色布騰巴爾珠爾奏言查丹壩土舍臣曾
令總兵五福實力駕馭茲據五福稟稱二月十七

日同副將李天佑前赴丹壩官寨挑派頭人土兵
一百二十名卽於是夜潛往穆爾津岡右面塔爾
沁地方燒燬賊寨二座殺賊一名并擒獲七名口
此內婦女六口給賞該土舍以示鼓勵其生擒之
德爾日嘉解至大營臣親加訊問據稱伊在穆爾
津岡聽見金川人說凱立葉山梁是要緊地方派
色爾里達扎木各寨人把守領兵頭人是達什阿
庫魯山塔爾薩木坦二人至谷噶路徑從前未曾
走過聽見山勢窄狹小路叢雜現派有格魯瓦覺
及達色爾木波等寨人據守因賊人被官兵殲戮

甚多連班第喇嘛俱遣出來打仗領兵的是勒烏
圍頭人達寔策旺格魯瓦覺頭人桑結塔爾等語
除將該番正法外臣等復札囑五福畱心察訪賊
人無備之處卽撥土兵前往剿殺以分賊勢奏入
諭曰阿桂等奏訊據賊番德爾日嘉供詞內有賊被兵殲
戮甚多將喇嘛班第遣出打仗等語此卽賊人滅亡之
兆從前準噶爾額魯特等被大兵窮蹙將喇嘛班第等
俱行遣出打仗是以旋卽殄滅今逆酋索諾木因大兵
深入不能抵禦始將喇嘛班第等遣出由此看來賊酋
斷難久存大功指日可就朕當佇聽喜音

十八日

公借色布騰巴爾珠爾奏言查得羅博瓦迤下山岡之北有得斯東寨一處係賊番住居之地人戶不多從高下壓既可無用多兵而燒燬其寨殲戮其人亦足令賊番喪胆因於初五日令海蘭察額森特福康安海祿等帶兵分爲兩隊前往剿殺比至寨前賊番上前迎拒而寨內之賊亦放鎗助勢官兵鎗箭齊發殺賊十餘人其餘奔竄額森特督兵斫破寨門縱火焚燒賊人出寨奔逃我兵追殺又斃十餘人但此寨附近凱立葉若令官兵留任

賊必疑我有會攻凱立葉之局預先設備轉有未
便因令官兵緩緩撤回臣等於數日內將所有要
隘卡棚趕修完竣即可抽撤官兵迅速妥辦

公又借色布騰巴爾珠爾奏言三月初三日有小
金川番人科爾甲斯丹巴二名從賊境投出來營
臣卽親訊據稱聞得谷噶一路官兵甚爲利害前
日格魯瓦覺一仗頭人被鎗箭死者共有六七人
又有金川大頭人達寔策旺頭上中箭拾回不知
死活金川人都說官兵把羅博瓦全奪去了弓箭
甚爲利害現派各頭人在各緊要地方把守惟有

丹巴沃雜爾山塔爾薩木坦兩人來往巡查與索諾木莎羅奔岡達克商量事情等語查該番所供情節與臣節次訪訊無異而伊等妻子現在安插雜谷腦核其名字年歲亦屬相同似無可疑近奉上諭賊人屢次喊稟應照前此語意傳諭賊番使之離心

臣等當將前此出示大意詳悉告教並賞給科爾甲等衣帽派兵弁送至前敵高聲叫喊賊番聞知均各俯首無詞似有心動之意因令科爾甲等暫回雜谷腦看視家屬後再來軍營以供差遣均奏入

諭曰阿桂等奏焚勦得斯東寨情形一摺所辦甚好佇盼
捷音又奏番人科爾甲等供稱官兵此次攻勦金川賊
人都極害怕等語官兵連次得勝聲勢倍加壯盛乘其
聞風胆怯之時相機乘入自可卽望成功至頭人內丹
巴沃雜爾尤爲可惡若能及早殲除則金川失一得力
之人我兵奮攻自更易爲力阿桂等務努力爲之發去
鏤玉題崖鞞一枚朕親製詩命工鑄成寄賞阿桂爲指
顧銘勲吉語將此加緊傳諭知之

恭錄

御製詩

詠題碧玉韞賜將軍阿桂

閭體誠資挽六鈞玉工琢作刻崖人漫嗤沙苑詩無謂

方用

岳秋

可識浯溪筆有神臂病多年疎射鵠心塵邇日望書

崖事麟良球等度奚相稱合賜燕然勒績臣

二十三日

公偕色布騰巴爾珠爾奏言

臣

等查羅博瓦山峯

一帶業已攻開官兵隨在可以相機直搗且距勒

烏圍日近賊勢日形窘迫衛死護巢自必前來死

鬪但賊人深知官兵精銳異常而弓箭尤爲所畏

斷不敢明來接仗必於夜間侵擾

臣

等先已嚴飭

各卡倫倍加防範三月初七日亥刻雪霧迷漫之際有賊八九百人分爲四股一股從羅博瓦山陽潛上兩股從羅博山陰潛上合搶山峯中間副將常祿保營盤又有一股直攻登古後山維時賊人將常祿保營盤四面圍攻勢甚洶湧常祿保督率官兵放鎗拋石奮力擊打并將跳入卡內之賊立即砍斃其時烏什哈達額森特福康安聞有鎗聲先後帶兵接應而常祿保所帶陝甘官兵一見援兵來至勇氣倍增內外夾擊賊人慌亂敗逃其侵擾登古山梁賊衆亦已潛至湖廣官兵石卡拚死

衝撲官兵正在相持普爾普聞信亦帶滿漢各兵
分爲兩翼衝殺賊番勢不能支下溝敗遁維時烏
什哈達等正欲接應登古山梁見各路賊番順溝
逃遁遂同巴圖魯侍衛額爾特等帶兵從山坡斜
下截斷賊人歸路鎗箭齊發往來衝殺直至次日
卯刻賊人除殺死之外帶有鎗箭傷者甚衆俱滾
山穿箐而逃至初八日夜間雪霧更大又有賊百
餘潛來參領索柱副將楊崑營盤官兵瞭見放鎗
追擊賊番亦卽敗回查賊因大兵卽日搗巢瀕死
心迫不但於各寨內極力攢湊且可打仗賊人及

番僧等悉行派出並於宜喜日旁抽撥四寨之人
且係莎羅奔弟兄等三人與伊大頭人等親自率
領前來實已盡其力量抵死一戰希冀捨奪羅博
瓦山峯及登古了口卽可截斷官兵彼此不能接
應是以并攜帶口糧以爲據守之計不料我兵防
範嚴密賊旣無從奪據轉使官兵奪其歸路得以
痛加殲戮并斃其大頭人嘉木阿中雍中朋實爲
天奪其魄所以初八日夜賊雖料我兵得勝之後
不復設備或尙可以乘隙得志而所來賊衆止有
百餘一經官兵知覺相率潰逃則其心胆俱寒已

可概見若再得一二勝仗并復痛加殲戮則賊番
震懼既深勢必漸行潰敗奏入

諭曰阿桂等奏痛殲偷刦官兵營卡賊衆情形一摺所辦
甚好此次常祿保功績甚爲出衆已有旨賞給巴圖魯
名號並令以總兵升用以示鼓勵其在常祿保軍營出
力兵丁亦著查賞又另有賊衆侵擾登古山梁營卡官
兵亦奮力相持經普爾普帶兵往援將賊衝擊殲斃是
登古帶兵之員亦尙爲出力並著阿桂查明如有應獎
賞之處奏聞請旨其烏什哈達額森特福康安普爾普
聞有鎗聲卽各帶兵前往接應亦屬可嘉並著阿桂存

記俟攻克時一併開列事蹟交部優叙看來現在賊勢
日益窘迫其自衛必更著急而其狡詭之處亦甚爲可
恨恐似此潛出劫營之事皆所常有而官兵漸次采入
賊計亦必以漸而增尤不可不實力防禦各路將軍當
轉諭守卡各員均須加意嚴守務以常祿保爲法以冀
仰承恩眷至王進泰年齒漸老且未經軍務在美諾不
能得力已將伊調補廣西提督派令旺保祿馳驛前往
署理四川提督事務矣

公又奏言臣查此次大兵進剿業已摧開要隘前
距賊巢甚近賊人雖節節死守勢必即可殄滅若

再得生力兵二三千另爲一路伺隙搗虛更可迅
速集事查吉林索倫兵丁驍健出衆惟計算程途
太遠卽京兵前來亦需時日且車馬費用較多

臣

仰荷

聖明垂詢悉心斟酌竊思雲貴兩省距川旣近而兵丁亦
爲得用若將該督撫奏明預備之五千兵特降

諭旨令其來川程途旣爲捷近若一有竣事之局停止亦
易奏入

諭曰前以阿桂等分剿金川俱能乘勝深入或分路進攻
更易集事因將應否添用京兵之處令阿桂熟籌密奏

今阿桂奏稱京兵到營稍需時日因思雲貴兩省距川較近且昨歲該督撫等曾預備兵五千應請旨調令赴川應用所籌亦是著傳旨李湖圖思德卽將上年預備調川省兵丁內揀選雲南兵三千名貴州兵二千名並選派勇幹習練將領等帶兵迅速進行所有軍火器械一併攜帶毋稍滯滯

公又借色布騰巴爾珠爾奏言查豐昇額一路官兵現雖有達爾扎克山溝攻佔凱立葉山峯三卡而賊番尙於第四峯緊守未能卽時攻克臣等原擬從凱立葉山牋日爾巴當噶地方斜上接通豐

昇額之兵惟是此一帶詳悉形勢臣等未經親歷
因節遣番人賡噶等探看道路復令都統海蘭察
親往相度據海蘭察等回稱以日爾巴當噶礪卡
如有多兵彼此夾攻未嘗不可搶佔但豐昇額處
除分防外只能抽出兵三千人而此間羅博瓦一
帶分駐官兵亦僅能抽撤二三千人且該處箐林
深密崖礪陡險兼之彼此隔遠雪霧時作萬一不
能如約一處稍稽卽不免一處失控自應遵照近
奉

諭旨令豐昇額將凱立葉緊要處所令五代帶兵牽綴而

親自帶兵數千前來或先攻日爾巴當噶礪卡或
截喇穆喇穆後路分兵攻取格魯瓦覺遜克爾宗
等處均無不可辦理俟與豐昇額會見籌定進攻
之處另行具奏奏入報

聞

二十九日

公偕豐昇額色布騰巴爾珠爾奏言查谷噶一路
自官兵得羅博瓦勢據建旆三面皆可進搗但喇
穆喇穆之賊尙未潰散分頭防堵難免多分兵力
羅博瓦山岡之下賊番木城石礪亦可奮力搶佔

但該處箐林深密而賊又恃遜克爾宗爲之犄角互相援應從此攻破亦不無多損官兵臣等公同籌議喇穆喇穆山溝本爲從谷噶進取勒烏圍正路現在喇穆喇穆之賊因與勒烏圍有路可通拒守甚嚴然羅博瓦對面山梁卽係喇穆喇穆後路此一道山梁迤邐而西南已距勒烏圍不遠賊人遠送口糧火藥均須經由於此而山梁下截拉枯喇嘛寺之上爲日則丫口尤係賊人往來要路若從羅博瓦發兵突往佔奪則雖山溝深箐內或有小路可通而賊已難於久據但官兵搶佔此處

處賊人又必悉力前來救援臣等擬分兵六隊一隊進攻別斯滿丫口對面第一峯第二礮卡一隊由淖爾進攻第三大礮一隊進攻相近薩斯嘉赤溝底之礮而此一條山腿上排列之各礮內有相距尚爲稍遠者擬分兵兩隊迤邐由山坳箐林斜上以擣其虛而另選精銳各兵從羅博瓦下溝攀附上山直攻喇穆喇穆之後官兵分頭搶撲賊必分頭守禦乘其慌亂由羅博瓦進攻之官兵直前奮速而登攻搶日則丫口礮卡自可望其佔據一經佔此則不但格魯瓦覺各寨皆係平礮已歸掌

握而喇穆喇穆賊人火藥口糧艱於接濟當必不
攻自竄臣豐昇額業抵谷噶所帶官兵亦於十七
日全數到來雖此間自十四日以來連日雨雪甚
大但究係春深消融尙易臣等現在部署已定一
俟兩三日晴霽即可分路奮攻

公又借色布騰巴爾珠爾奏言查二月間梭磨土
婦卓爾瑪卓克采土司甲噶爾布木均遣其頭人
前來懇請執照又三月初間緯斯甲布土司雍中
旺爾結亦遣頭人懇給執照爲憑情詞甚爲懇切
臣等當卽准其所請給與梭磨執照以卓爾瑪雖

係土婦夙知恭順現又派添土兵實心報効梭磨
土司從前所管地方百姓自應卓爾瑪子孫世管
若更能助力勦洗金川更必承受重恩又給與卓
克采執照以甲噶爾布木前此尙無違抗情事此
番攻勦又能多添土兵助勦惟有分付頭人百姓
令其真心出力自不致干譴責又給與綽斯甲布
執照以此番大兵進勦土司母子雖與金川親戚
並不存心瞻顧今歲以來相機勦殺更爲出力嗣
後仍須鼓勵土兵實心攻勦自有重恩並將發執
照之意詳悉曉諭各頭人等均欣喜而去

公又偕豐昇額色布騰巴爾珠爾奏言

臣

等公同

商議令

臣

豐昇額前來谷噶併力辦理茲於十三

日

臣

豐昇額來至谷噶隨上新得羅博瓦山梁察

看形勢甚爲高險官兵所佔均係要路且離勒烏

圍賊巢亦近較從前別路進兵實更得勢已將達

爾扎克一路之兵酌畱五千餘名派五岱書麟等

率領固守以牽賊勢挑出勁兵四千餘名派得力

之侍衛章京分隊帶來以資合力進取均奏入

諭曰阿桂等擬從羅博瓦對面山梁分兵六隊進攻乘勢

佔取日則丫口一摺所籌甚好佇盼捷音又另摺奏梭

磨土婦卓爾瑪卓克采土司甲噶爾布木及綽斯甲布
土司雍中旺爾結均遣其人懇請執照並准所請給予
諭以實力報効等語該土司等隨征已二三年至今始
請給照自其震攝兵威知金川必就滅亡故乞此以爲
將來免禍邀恩之券阿桂各如其意以釋其疑而收其
力甚合機宜更當諭以爾等得受執照卽與內地武員
剖付相似嗣後如益加奮勉俟大功告成後奏聞大皇
帝必加重賞並當令爾等輪班朝覲筵宴加恩如此則
該土司等自必更知感激至現在豐昇額帶兵四千餘至
阿桂軍營聲勢甚盛分路追攻自爲得力但兵貴先聲

若令賊人知我續調雲貴精兵將次到營更足使之喪胆不妨於軍營及後路各處令屯土兵練共相傳布以現又調有雲貴勇銳官兵數萬四月內即可到營添此新兵合力進剿成功更易賊衆聞知自必更生怖畏即滿漢官兵聞此說亦必更加踴躍將軍等均應努力爲之

公又偕色布騰巴爾珠爾奏言小金川降番頭人
僧格告稱我等小金川番人兩次受

天朝不殺之恩無可報効誓必帶領降番將羅博瓦山峯
內緊要礮卡奪取以見出力之意又稱我家口蒙

恩安插乾堡地方倘或打仗身亡只求照顧我家
口不至飢寒等語卽帶降番突入大石卡內砍殺
多人又復合攻大礮並刨挖礮根施放火彈遂致
中鎗陣亡當卽賞銀一百兩付給其家以資養贍
并免其妻子差使奏入

諭曰據阿桂等奏稱僧格以小金川降番能知感恩報効
奮勇捐軀甚屬可憫雖經阿桂卽時賞恤思之尙堪憐
惜著傳諭阿桂查明僧格共有幾子視其稍有出息者
卽行奏明送京候朕加恩賞給官職以示優恤降番之
意並將此宣諭衆番俾知朕於感恩効死之降番雖其

附錄卷之三十一
身歿尙且錄用其子使現在者踴躍圖功未來者聞風歸附亦可爲招致降番之一助

四月初六日

公偕色布騰巴爾珠爾奏言

臣等接富勒渾等摺

稿稱三道灣喇嘛寺等處均有夾壩又稱拏到小金川賊番訊知此路賊酋現派頭人丹巴沃雜爾莫撤斯欲搶明郭宗木波一帶糧臺及翁固達卡座隨卽派員嚴加防範等語查現在大兵分路進攻賊番斷無遣力更爲截後之計不過小金川番人投在賊境不給口糧令其伺間搶掠以駭官兵

聞聽如能搶得糧臺便可餬口此等窮番不過如竊盜臨時行強者比若各糧臺看守嚴密賊人來無所得勢斷不能佔住金川賊衆本好爲大言以欺番衆且因上年木果木之事亦從木波等處分頭截搶又不知此時西路大兵後路已從楸砥往來是以仍爲此語而小金川番人等輒信其狂吠據爲供吐至丹巴沃雜爾係金川主謀第一大頭人該賊酋弟兄所不可離者前次谷噶官兵攻打至萬分要緊丹巴沃雜爾始行親自前來希圖截後此時斷無有帶數十醜徒窺伺明郭宗之理此

等供詞不待辨而可知其妄但恐該提督等未悉情形偶有零星賊衆驚恐張皇紛紛調撥自行擾亂轉使賊人得以乘機而入臣等卽行知常青等以此後駐兵地方飭令弁兵高壘深溝晝夜巡防毋稍疎懈倘有賊衆前來其本卡之將弁督兵堵禦其餘附近各卡應接應者分兵接應應自守者列兵嚴守萬不可因一處有賊盡撤他處官兵救援轉使空虛之處致爲賊據卽如賊番供內有搶佔明郭宗之語如賊果至明郭宗其上阿爾圖之兵卽可憑高堵禦而又令美諾防兵星夜合剿賊

番自將逃竄不暇計復安施况南路之後路已移
在章谷打箭爐一帶而西路之楸砥現已大通文
報輒輸從此經行均爲近捷昨富勒渾親往布朗
郭宗等處將一帶糧臺酌撤嗣後賊人益復無從
窺伺自必漸爲寧謐奏入

諭曰阿桂等奏丹巴沃雜爾係金川主謀第一大頭人該
賊曾兄弟所不可離者此時斷無轉領有限醜徒窺伺
明郭宗之理等語與朕昨降諭旨適合所見實爲有識
至所稱恐該督等未悉情形偶有零星賊衆卽驚恐張
皇紛紛調撥自行擾亂使賊人得以乘機而入等語尤

附錄五
言
卷一
三
爲扼要此一節交富勒渾旺保祿常青妥協辦理

二十日

公偕色布騰巴爾珠爾奏言伏查西路南路官兵已漸逼其巢穴賊情窘迫是以悉其醜類節節負隅卽如近有出來之兵丁番婦等供稱賊酋因格魯瓦覺一路官兵攻打甚緊不但莎羅奔兄弟三人帶兵親來抵禦並索諾木及其姑阿青等均來遜克爾宗是其螳臂當車實已不遺餘力現蒙皇上添設官兵若更另開生路攻其不意賊勢愈分愈單自可速期得手臣等查此時未進兵之各路惟正

地一處自進剿以來從未經大兵攻打比之他路賊酋預備稍疎前此業經

聖明垂詢並經明亮奏覆稱由正地直搗中堅洵爲制勝

良策訪之能事頭人咸稱至善等語是南路分兵由正地前進實爲得濟

臣

阿桂前亦籌議及此核

計霍爾部落如德爾格忒各土司尙可派土兵四五千人若再得漢兵五六千人即可敷一路之用查南路軍營於去年八九月間已添滿漢各兵四千五百名至去冬及本年正二月內又添楚兵三千雖章谷等處後路駐兵約有三千但抽出二三

千名自無不可至新調滇黔兵五千內擬撥往南路二三千又加以吉地等處本有駐防漢兵一千餘名則已有兵五六千人再將德爾格忒士兵限以時日酌調前來漢土各兵核計萬餘即可敷一路之用但近日正地情形相距窻遠無從深悉業於奉到

諭旨時卽密札明亮等囑其熟籌具覆至綽斯甲布一路亦係賊所深悉現今雍中旺爾結及其頭人等節次多派土兵奪礮殺賊若將派往正地所餘滇黔兵丁添入綽斯甲布軍營合勢攻擊亦必倍爲有

力惟是軍營情事隨步換形本難懸定約計此項
調撥官兵到營尙須四五十日而喇穆喇穆一路
雨雪連綿茲已於初八日見晴雖賊乘雨雪之際
又增添碉卡而此時務期必克俟兩三日晴霽卽
當竭力進攻得有一二勝仗卽可進攻勒烏圍若
滇黔官兵將屆出口時此間已有必克賊巢之勢
臣等擬將此項官兵調赴西路厚集兵力迅期殄
滅奏入

諭曰阿桂等奏初八日天已放晴俟兩三日後卽督兵竭
力進攻又稱若欲別開生路則惟正地一處預備必疎

等語自應如此籌畫看來各路進剿大局惟阿桂一路實有進取之機若已攻得遜克爾宗或直抵勒烏圍則兵力愈多成功愈速現在黔兵已於四月初旬陸續出境滇兵亦報起程竟當將此滇黔兵五千卽速全數調往以冀尅期集事設或谷噶一路急切未能窺入則又不宜專事守株計正地一處從未攻剿賊人未必預防若調滇黔官兵二三千遄赴正地派添德爾格忒土兵令明亮統領攻剿可望得手其馬爾邦一路則令富德畱駐以牽綴賊勢亦屬正辦著傳諭阿桂卽密札明亮等妥商而行

二十八日

公偕豐昇額色布騰巴爾珠爾奏言竊查正地一路可進兵以搗賊虛明亮等擬將新調滇黔兵酌量撥給以資攻取茲十一日草布什咱土舍丹怎扎克巴差頭人根闊勒等來營稟稱正地本係草布什咱之地舊時百姓五十餘戶並未遷移該處不過金川小頭人數人在彼監守現在甲魯有草布什咱兵三百名又有孔撒麻書土兵若令此項土兵突然前往可以招降不然亦能力取而由正地前至獨松攻打亦易爲力等語查正地進兵之

處臣奉到調撥滇黔官兵

諭旨卽已密札明亮等商辦嗣又奉

旨垂詢正地是否可以進兵情形隨將覆奏摺稿行知明
亮妥籌速覆今正籌議間而草布什咱土舍適又
遣人前來備陳進取事宜懇請官兵接應軍機頗
爲湊合臣又於十一日飛札明亮等迅速辦理奏
入報

聞

公又借豐昇額色布騰巴爾珠爾奏言查雜谷三
土司向來行事均屬相同獨於給照一事前從噶

克柔經懇請臣等是時揣度番情益因噶爾滿魯
木宗隄柔等處原係雜谷之地前因土司蒼旺泊
罪策楞岳鍾琪已將噶爾滿魯木宗賞給綽斯甲
布隄柔賞給丹壩乃金川賊酋又唆使從噶克搶
佔在該土司亦明知私行佔據於理非宜現又尙
無出力之處若懇給還此地自覺難于措詞是以
未敢遽請茲從噶克土司納木嘉勒令其大頭人
安本來稱今土司派兵攻打金川總是真心出力
求將從噶克舊管之噶爾滿魯木宗隄柔百姓賞
給土司並給一張明白執照等語臣等論以此三

處地方既經分給綽斯甲布丹壩卽當遵奉法令不得私相爭奪况爾土司雖現派兵助剿而綽斯甲布土司亦屬實心出力若賞爾管理執照何以服彼兩土司之心總俟將來看爾等出力如何再行辦理據安本回稱將軍吩咐實屬公正不敢復置一詞經臣如此曉諭伊等自揣助兵攻剿稍有不如綽斯甲布之處卽不復能邀

恩賞則督令伊土兵攻打必倍爲有力奏入

上嘉之